

Davutoglu: Assad je kao Milošević

10 februar 2012 Izmijenjeno 22:34 CET

Turski šef diplomatije u Washingtonu kazao da je Turska protiv svake tiranije iako ne podržava strane intervencije



Niko ne može očekivati od međunarodne zajednice da ne učini ništa protiv lidera koji tlači narod, kazao Davutoglu [EPA arhiva]

Turski ministar vanjskih poslova uporedio je sirijskog predsjednika Bashara al-Assada sa bivšim predsjednikom Srbije Slobodanom Miloševićem i kazao da je Turska “danas na strani ljudi iz Homsa kao što smo bili na strani građana Sarajeva”. Davutoglu, koji je u petak u Washingtonu održao predavanje u Centru za međunarodne i strateške studije, kazao je da Turska želi da Assad bude kao Gorbačov, “da transformira sistem, da prihvati strukturu nastalu nakon Hladnog rata”.

Veliki interes

“No, on je izabrao da bude kao Milošević. To je bio njegov izbor. Danas smo na strani ljudi iz Homsa kao što smo bili na strani građana Sarajeva, kao što smo bili na strani stanovnika Gaze protiv Izraela, odnosno u slučaju Sarajeva protiv Miloševića. Jedan je ugnjetavač musliman, drugi židov, treći kršćanin, ali tu nema razlike. Ugnjetavač je ugnjetavač, a Turska će biti protiv svake tiranije u našoj regiji”, zaključio je Davutoglu.

Kako je iz Washingtona javio reporter Al Jazeera **Ivica Puljić**, Davutoglu je govorio pred prepunom dvoranom. “Moram reći da godinama u Washingtonu nije bio ovakav interes za neko predavanje kao ovo, s turskim nakanama da vodi aktivnu miroljubivu politiku, iz čega je bilo vrlo vidljivo da turski politički establishment, potaknut odličnom ekonomskom situacijom u zemlji, želi osigurati značajniju ulogu svoje zemlje na međunarodnoj sceni”, kazao je Puljić.

Turski ministar vanjskih poslova je rekao kako je njegova zemlja protiv stranih vojnih intervencija, ali da to ne znači da Assad može ugnjetavati sirijske građane. “Ako imamo autokratskog čelnika koji tlači vlastiti narod, niko ne može očekivati od nas ili međunarodne zajednice da ništa ne učinimo”, kazao je Davutoglu. “Kada sam posljednji put bio u Damasku, prošlog avgusta, jasno sam rekao Assadu –

‘gospodine predsjedniče, ako ima i jedan strani napad na vas, bit ćemo na vašoj strani. Ali, ako se borite protiv vlastitog naroda i prisiljavate nas da se odlučimo na čijoj smo strani, jesmo li uz vas ili uz narod, nećemo se dvoumiti nijednu minutu – mi smo uz narod!’

Protiv napada na Iran

Govoreći o mogućem izraelskom napadu na Iran, Davutoglu je izjavio da bi vojni napad bio katastrofa. “To ne bi smjela biti opcija, posebno u ovom trenutku historijske prekretnice u našoj regiji. Mi nikada nećemo prihvatiti bilo kakav vojni napad”, kazao je turski šef diplomatije.

Davutoglu je također pozvao na priznavanje palestinske države.

On se u ponedjeljak sastaje s američkom državnom tajnicom Hillary Clinton, s kojom će razgovarati o Siriji, palestinskom pitanju, NATO-u, te situaciji na jugoistoku Evrope, pogotovo u Bosni i Hercegovini i na Kosovu.

Izvor: Al Jazeera